

TARDE - MARTINA = 5 a 0...DE MARTINE?...CHIU' BARESE CA TARANDINE

L'ha mann't Aldo "Diecipalazine"
domenica 24 febbraio 2008

Ehehehehe, ste martenise accòme stònne acciiiseeeee. Ggià stù fatte ca tenéne ‘u prefisse zerottànde accòme alle barise, a dice lònghie. ComunGue peccàte osce ca nònge hamme sciùte o’ càmbie…nuje fésse… piccè le driite stavéne ‘u stésse. No ‘u sapite accòme funziòne aqqà? Pe ll’amiche dell’amiche dell’amiche le pòrte stònne sèmpre apièrte, e se paparesciavéne pùre ste mangiapàne ‘a trademiènde… Bah! ‘A partite ha stàte mòscia moscia, sarà ca le martenise s’avevéne strafucàte de gnummarièdde e de capocòlle, e accussi EMERSON, ‘u brasiliàne e CUTOLO hònne menàte doje bombètte ‘mbòrte ‘mbrésse ‘mbrésse. ‘U cendrattàcche nuèstre, PLASMATI, ha pigghiàte doje pallùne sùle e ha segnàte doje gòl e ‘u quìnte gòl l’ha fatte TESSER, n’òtre brasiliàne. Pùre quidde pizzarròne affetesciùte de BARASSO nònge ha smarrunàte osce, pùre ca ‘mbòrte pàre accòme a une ca stè azzettàte sùse a ‘nu trùlle scugnàte. Uagnù, da dumàne quànne n’accàppe ‘nu martenése le putime dicére GIVE ME FIVEEEE, oppure ce scè mangiàte ‘u c..agnèlle o’ fornèlle putite pigghià le còse a cinghe a cinghe, cinghe copèrte, cinghe bombètte e cinghe mètre de sazizze..asckuànde. L’allenatòre nuèstre, CARI…catelo de mazzàte… ha rischiàte brùtte piccè ha mmise in càmbie CARROZZA senza CAVALLO, ehehehe, e l’ha sciùte bbòne piccè ‘a carròzze ha truzzulàte ‘u stésse fòrse piccè jè mègghje ‘na carròzza sènza cavàdde ca ùna caresciàte da ‘nu ciucce martenése. Cinghe è bell, cinghe è bèlleeeee, na na na na, naaaaaaaa…ah me ne stè scurdàve. ‘Nu salùte alle cumbàre d’u guestbùùk de tife e amicizie ca me leggéne… Forza Tarantoooo.